

香港話劇團

禁毒 **COSPLAY** 巡迴

《靜香的抉擇？》

(第三稿)

編劇：陳美莉

【燈亮。響起了太空音樂。一外星人連同手上大畫冊出。】

場外音：喺廣闊無邊嘅太空當中，除咗地球裡面住咗人類以外，仲有好多其實鮮為人知嘅星球，住咗好多其他唔同嘅星球人。其中…最為人熟悉嘅外星人有 K 隆星嘅 KERORO 軍曹小隊…

【外星人把畫冊翻到軍曹小隊的一頁。】

場外音：仲有潘朵拉星嘅阿凡達！

【外星人把畫冊翻到阿凡達的一頁。】

場外音：仲有侵略其他星球嘅 HELLO KITTY！

【外星人竟然把畫冊翻到冰毒大王的 一頁，示意「場外音」把資料弄錯了。】

場外音：唔好意思，搞錯咗……應該係……應該係……

【這時，冰毒大王出場。】

冰：哈哈，應該係……毒品星嘅冰毒大王先啱！

【外星人點頭，示意資料正確】

冰：各位小朋友大家好！HELLO！（四處和小朋友打招呼，狀什和藹）HELLO！可唔

可以同我做個朋友呀？（四處和小朋友握手，像明星一樣！）

【可是，冰毒大王走到外星人的旁邊。】

冰：小朋友……你好。

外：你好。

冰：去邊度玩呀？

外：喺呢度。

冰：咁，做咩呢？

外：畫畫…

冰：（搶走畫冊）嘩…好靚喎！而且，都差唔多畫好晒…

外：係…多謝你嘅讚賞。但係唔好意思……媽咪教我，話唔好同陌生人講嘢！（欲
離開）

【此時，冰毒大王得力助手 E 仔出場，堵著另一出口，阻止外星人離去。】

E：（向外星人）小朋友……你想去邊度呀？

外：你想點呀？

E：我想點？我想同你做個朋友啫！

外：媽咪話唔好同陌生人講嘢。

E：但係你依家咪講緊野囉！你睇下，我地好受呢度啲小朋友歡迎架！

你都一齊同我做個好朋友啦！

外：好朋友？

冰：係呀！E仔…我地準備左D好野俾呢位小朋友係唔係？

E：無錯。(拿出咳藥水) 試下吓，好正架。

外：咩黎架？

冰：魔法藥水。每飲一次，就好似飄飄然咁，飛上天空一樣。

外：飛上天空？

冰及E：無錯！飛上天空。

外：好似好得意咁呀！

冰：係呀，好得意架！

外：咁難唔難飲架？

冰：當然唔難飲啦！

E：有可樂味、提子味、涼茶味、檸樂味、檸檬茶味、檸七味、檸檬咪……

冰：任君選擇。做朋友，我地實有好野俾你嘅。

外：真係唔苦？

E：唔苦，飲完仲會輕飄飄，好似識飛咁！

外：真係咁神奇？好得意呀！

E：咁試下啦，試過唔鍾意，咪唔好飲囉。你自己可以揀架嘛！我地係朋友，唔會呃你嘅！

外：如果唔鍾意，真係可以唔飲？

E：當然啦！我地係 FRIEND 黎架嘛！唔會逼你！不過咁，唔飲，就好似好無用咁

囉……【外星人在猶豫中】

冰：E 仔，既然佢唔飲就唔好“SIDE”左佢，我地嘅魔法藥水係好珍貴架！佢都唔當我地係朋友…

E：(裝模作樣) 大王，唔好啦，求下你俾次機會佢！

冰：佢都唔肯試，即係唔夠 FRIEND 啦。(指向在座各位小朋友)頭先呢度個個人都當我地係朋友，你得佢唔當我地係……

E：大王，佢唔係咁嘅意思…

冰：你唔好再幫佢講好說話喇！

【大王裝作要對 E 仔作出懲罰。】

E：哎呀！無辦法啦大王。既然係咁，我就唯有將呢支魔法藥水收番……

(把藥水非常慢的放回口袋中)

外：唔好呀！

E：點呀，我親愛嘅朋友？

外：我諗，我可以試下…

冰：唔得，你浪費左頭先嘅機會。

E：大王怕你唔係真心誠意！

外：我……我……

E：等我黎幫你。大王，佢已經係我地嘅好朋友喇，佢好想飲架，係唔係？

外：我係真心誠意…真係想試架…冰毒大王！

冰：好，你話架！

外：多謝你呀！冰毒大王。

【外星人不斷喝下藥水，慢慢地，身體變得飄飄然的。冰毒大王與 E 仔互望，相視而笑。】

外：(神智不清) 我覺我好飄飄然…好似飛緊咁…

冰：(把它手中的藥水樽搶去) 係咩…

外：個樽去左邊度？

冰：喺呢度！

外：我想再要…

冰：(恐嚇) 再要……好呀，但係你要幫我做一件事？

外：(飄飄然) 一件事？我唔明白…(向 E 仔，跪下)求下你，再俾我…

E：(把它推開) 你想要都得，不過你要幫我地將呢啲咳藥水傳開去，等其他人都一齊飲，之後就個個小朋友都鍾意食毒品！

外：原來，你地係有陰謀架！你地俾左啲咩我飲？

E：咳藥水，病嘅時候，醫生都有俾你飲先好飲果啲呀！唔病係唔應該飲架！不過依家，你無病都飲咁多落去，亂咁食毒，即係吸毒！

外：吓！你地無啦啦俾藥我食！？你地俾毒品我！！！我要走！

冰：好呀。你咪走囉！（引誘外星人）哎呀，有毒品食啫！

【冰毒大王手執咳藥水引誘外星人，那支咳藥水就像具有魔法力量一樣，外星人十分痛苦。慢慢地，它就像扯線公仔，完全備受控制。】

外：我想再食呀！大王！

【此時，冰毒大王和 E 仔用布蓋著外星人，狀似魔法一樣。】

冰：好呀，你咁鍾意，就俾你食啦！（奸計得逞）哈哈哈哈哈！

【冰毒大王與 E 仔令外星人沉倫毒海。】

E：你已經再無利用價值喇！死啦！

【外星人被趕離場。】

E：報告冰毒大王，呢一個星球上面嘅小朋友依家已經染上毒癮，我地已經充滿力量喇！

冰：做得好！我地繼續用毒品侵略其他星球，控制果度嘅小朋友，好快我地就可以統治宇宙架喇！

E：(奸計得逞)哈哈哈哈哈！大王，我地下一個星球去邊度好呢？

冰：下一個，就係要侵略地球！

E：好呀！咁我地就即刻出發！

冰：出發！

二人：吸食毒品，染上毒癮！吸食毒品，染上毒癮！

【二人邊叫口號邊離場。】

【鬧鐘聲音響。】

場外音(靜香媽媽)：靜香，你又話放假，都想早啲起身溫書，要拎一百分，考第一名嘅？起身喇！

場外音(靜香)：哎呀媽媽，我琴晚又發惡夢喇！

【此時，靜香出場，她是個小胖妞，似乎剛剛起床……】

靜：(摸摸自己的衣服) 連續四晚……都發同一個惡夢，夢見冰毒大王同 E 仔要侵略地球呀！今日係假期，但係都要即刻溫書先得！

【靜香溫習，電話響起】

靜：唔知邊個搵我呢？

【靜香接電話】

靜：(答同學問題) 喂？哦！單數係 1,3,5,7,9,11,13,17,19，雙數係 2,4,6,8,10。唔

使客氣，再見。

【剛掛線，電話又響起，靜香接】

靜：喂？(答同學問題) PRESENT TENSE 嘅時候，HE SHE IT 要加 S 或者 ES，THEY 同

WE 代表多過一個人嘅時候就唔使加，但係如果係人名，就都要加 S 或者 ES。

無錯呀，BYEBYE！

【突然，手電響起。】

靜：(接手電，答同學問題) 邊個係李白？唐代詩人，同杜甫都好出名。「虎」，

唔係「圃」…(著涼) 乞痴！好凍呀，我唔同你講住喇，BYEBYE！等我著衫先！

【她拿起外套，欲穿上，怎料穿不下。電話又響起。】

靜：點解著唔落架？(聽電話，又再答同學問題，亦一直努力，希望把外套穿上)

喂，係，行政長官係曾蔭權，政務司司長係唐英年。香港 1997 年回歸中國……

唔係……洋紫荊係得 5 塊花瓣嘅，果啲係宮粉洋提甲，係唔同架。我唔同庶

講住喇，不如星期一番黎再教你吖。唔使多謝，助人為快樂之本嘛……BYEBYE

【靜香依然穿不下外套，煩躁】

靜：點解著唔落架！！

【突然，「格」的一聲，外套破爛了】

靜：弊喇，呢件係我最鍾意嘅衫黎架！我梗係肥左喇！點解又肥左咁多……點解

會變成咁？

【一會，她連忙尋找從前的照片，照片中的她，是個從前的她，身材比較瘦。】

靜：我以前呀，明明係咁瘦架咋…但係依家，點解會肥左咁多架？啲同學見到我實取笑我啦！

【此時，電話又響起，是大雄的來電。】

靜：(遲疑著) 死火喇！係大雄……佢一定係搵我出街玩！我一定唔可以俾大雄見到我咁肥嘅樣架！

【靜香望望手中的照片，決定掛線。】

靜：對唔住呀大雄！我要瘦我要瘦我要瘦！我減左肥，先會見大雄架！

【靜香離去。此時，大雄在靜香家的窗外，手上拿著多啦 A 夢的百寶袋。】

雄：奇怪嘞！點解靜香又無聽我電話嘅？等我去佢屋企門口搵佢先得！（跑到靜香家門前，叫進房內）靜香…我係大雄呀，你快啲出黎啦！點解我打咁多次俾你，都無人聽架？(沒有聲音) 無聲嘅？唔通大遠聽唔到？等我去窗口試下先！（跑到靜香家窗外）靜香…我係大雄呀，我拎左多啦 A 夢嘅百寶袋黎，可以同你一齊出去玩呀！

【發現靜香的房間中沒有人。】

雄：點解無聲架呢？唔通出左去？仲諗住襯多啦 A 夢同多啦美佢地去左旅行，剩低左個百寶袋，可以同靜香去玩下入面啲法寶 TIM，依家無計啦！（思考）不過話時話咁，你地知唔知呀？最近靜香好古怪，唔知點解我每次搵佢，佢都無聽我電話。（思考）我知喇！唔通靜香佢遇到一個好大嘅難題佢解決唔

到，所以唔得閒見我？唔得，我一定要周圍搵下佢先得！靜香，靜香，你去左邊度呀？

【大雄尋找靜香，離場。這時候，冰毒大王從二次元洞爬出來。】

冰：(視察四周，自滿) 哈哈哈哈哈……呢度唔通就係地球？嘩，仲有咁多小朋友嘅！(四週和小朋友打招呼) 同你做個好朋友先！你好呀小朋友！估唔到我地二次元空間嘅連接咁順利，睇黎呢個地方嘅年青人，好快又會好似其他星球，嘅年輕人一樣，染上毒癮！話時話啱，E 仔呢？E 仔唔見左嘅？(發現不見了他)E 仔？E 仔？你喺邊呀？

【不一會，E 仔從二次元洞爬出來】

E：大王！

冰：E 仔，你搞乜鬼呀？

【E 仔的屁股堵塞在二次元出口。】

E：大王！我個 PATPAT 太大塞住左個二次元入口，所以遲左。

冰：咁論盡架！

【冰毒大王把 E 仔從出口中拉出來】

E：哎呀！我個 PATPAT 呀！

冰：E 仔，你望下，我地已經去到地球喇…

E：我地終於都去到地球喇，大王！

【二人十分感動，相擁。】

E：大王，我實在太開心喇！既然係咁，我地快啲征服埋呢個地球！令到呢度所有嘅小朋友都染上毒癮啦！

冰：好呀，咁我地快啲俾啲毒品啲小朋友試下啦。

E：咦，等我地去呃下果邊個小朋友先。

【二人走觀眾的面前。詢問觀眾。】

E：(拿出「藥丸」) 小朋友，做個朋友仔吖？見唔見到有粒白色嘅搖頭丸，呢粒係糖黎架。試下，食完，你會係咁搖頭，好開心架。

【等待觀眾反應，無論對方的回答如何，拿出咳藥水。】

冰：小朋友，我地俾支藥水你飲吖！好好味架！有可樂味、提子味、檸樂味架！
詆下呢！

【等待觀眾反應，如果被拒絕，E 仔表示不忿。如果答應，表示高興，但不會把「藥水」給予觀眾。】

冰：(拿出天拿水)小朋友，用個鼻，聞一聞，你會好舒服架，好似上左太空咁。
夠膽聞先係朋友！你唔係唔夠膽呀嘛？我地朋友黎架喎！

【等待觀眾反應。】

冰：放心，聞下天拿水唔算吸毒。黎啦，好有型好好玩架！

【等待觀眾反應，如果被拒絕，表示不忿。如果答應，表示高興，但不會把「天

「拿水」給予觀眾。E 仔於另一邊箱。】

E：(拿出K仔) 拎條飲管，索落個鼻度，個感覺好得意，索完仲會好精神，考試一定一百分！

【二人不斷詢問觀眾。】

冰：呢班地球人真係激死我！啲意志力咁堅定！

E：大王，會唔會我地係失敗架呢？算喇，我地都係放棄喇！

冰：咪住！我記得二次元出口果度，有個細路女，讀書又叻，又乖，如果我地可

以成功令佢染上毒癮，咁其他小朋友就會有樣學樣…咁我地就好

容易可以征服呢個星球！

E：大王英明！

冰：我地到時就靜靜雞，令佢染上毒癮！

二人：靜靜雞、靜靜雞、靜靜雞……

【靜香進入房間，撞到二人。她很害怕，大叫。】

靜：點解有兩隻咁核突嘅怪物喺度架？嘩！

【靜香大叫，四處尖叫奔走。】

靜：唔通我又發緊夢？等我訓教先！

【靜香立即躲進被窩。冰毒大王及 E 仔走向靜香。】

靜：(把頭伸出被窩，十分驚慌) 死啦，訓唔著。

【靜香十分害怕。又大叫，四處尖叫奔走。】

靜：無事嘅，無事嘅。一定仲係發緊夢，等我搵下自己先！

【她「扭」一下自己面珠，痛】

靜：(十分害怕) 呀！好痛呀。(吸一口氣)

【她「扭」一下冰毒大王和 E 仔的面珠。二人痛得尖叫。】

靜：(十分害怕) 呀！佢地仲痛過我呀。唔係發夢呀！

冰及 E：係真架！！

靜：你地想點呀？

E：無咩想點……我地…

冰：想同你做個朋友！

靜：唔同你地做朋友呀！我知道你地係邊個！你地係冰毒大王同 E 仔！你地係

壞人！專叫啲小朋友吸毒架！

冰：你要搞清楚，食下咳水、丸仔、K 仔、FING 頭丸唔算吸毒

靜：你地想點呀？我係唔會上你地嘅當架，我係一定唔會吸食毒品架！

E：放心，我地唔係黎叫你黎吸食毒品！

靜：咁你地黎做咩？

冰：係同你做個好朋友…

E：同理…

冰：我地係黎向你推介一個努力讀書減肥套餐。

靜：努力讀書……減…肥…餐？

E：你可以繼續好似平時係咁食野。但係唔會肥。

冰：仲會一直一直咁瘦落去，而且，最重要嘅係，你會有用唔完嘅精神，可以不
斷讀書…什至可以唔使訓覺…

靜：一直咁瘦落去……唔使訓覺……一直讀書……嘩！下個星期就係期考喇，如
果可以唔使訓，咁我可以讀書讀書，讀好多書囉……

E：到時就可以突破自己，科科一百分！可以威俾所有同學睇…

靜：真係？

E：當然，我同大王從來都唔講大話！

靜：咁我要點呀？

冰：好簡單…你只係需要做一件事。就係做我嘅朋友，然後黎我嘅身邊，聞下我
冰毒大王放嘅冰煙。

靜：冰煙？一定係毒品，會上癮…我唔制……

冰：放心啦，食 FING 頭丸果啲先係吸毒，聞下冰煙邊算？

E：無錯。而且你係叻女黎嘛！聞得果一次，又點會上癮呢。

靜：我……我唔信你地……

冰：最多咁喇，我嘅朋友。如果你唔鍾意，我地唔會逼你。但係如果你鍾意，你
要幾多，我就俾幾多你！

E：試一次先啦！下個星期，唔係就係期考咩？唔使訓……咁可以好多時間溫書。

你諗下啲，仲可以減肥……我地點會呃到你呢，我地好朋友黎架嘛。試啦試啦！

冰：想要，你就可以隨時搵我地。一切就喺你掌握之中。絕對唔會講大話。

【靜香在猶豫，摸摸自己的腰。】

冰：算啦 E 仔，我諗佢對自己咁無信心，我地都係唔好幫佢喇。

E：咁又係，無信心…無鬼用…做肥妹。

二人：無鬼用，做肥妹、無鬼用，做肥妹！

靜：我唔做肥妹呀。好啦！我試。但係試完之後你地要即刻走…我叫你地，你地

先好出黎。

E：我地一定唔會反口！

冰：好，一切由你話事。

E：大王我地準備好喇！

【E 仔把小樽遞給冰毒大王。冰毒大王施出冰煙，靜香嗅了冰煙…】

靜：嘩，好得意呀！

【冰毒大王再施出冰煙】

靜：暈暈地嘅！

E：靜香，如果你再妻需要先搵我地啦……

冰：不過……我相信，你會好快搵我地。

【E 仔和冰毒大王奸笑，二人離開。】

靜：好得意呀，暈暈地咁。(伸展四肢) 好似好精神咁呀！好等我溫書先…

【靜香立即開始溫習。】

靜：好野呀！我愈黎愈精神！

【時間不斷的過去，靜香不斷溫習。她看看時鐘，想要去睡，可惜睡不了，又繼續溫習。時間又不斷的過去。她不斷的重複剛才的動作，當她覺得累時，便呼喚冰毒大王。繼續吸冰煙…慢慢地，她變得愈來愈依賴冰毒。】

靜：我要溫習！我要不斷溫習，我要繼續溫習！

【靜香不斷溫習，不斷翻閱書本，她變得十分煩躁。她不斷的重複剛才不斷溫習的動作。慢慢地，靜香的神智開始變得不清醒，十分暴躁！】

靜：我最討厭就係數學！啲數字搞到我個腦亂晒！(拿另一半書) 中文，我個腦實晒！我根不得啲人死晒呀！總之我咩都唔想做！(把東西推倒在地上)。我討厭呢個世界！你地同我全部走開！

【靜香走到街上，不斷聽到其他人的聲音。】

場外音：佢係靜香呀！瘦左好多呀…但係好古怪。

場外音：佢成三日無番學喇。

場外音：佢個黑眼圈好大呀…

場外音：好肉酸呀佢！

場外音：睇下佢雙手…都唔知係唔係生野…

場外音：大熱天時著冷衫，佢一定係生野呀！

場外音：有人話佢食毒品呀！

場外音：好變態呀佢！估佢唔到。

場外音：生到成身都係……

場外音：有人話係冰瘡！

靜：唔係呀！

場外音：靜香

場外音：生到成身都係……

靜：唔係呀！

場外音：靜香

場外音：好肉酸呀佢，睇下佢雙手…

靜：唔係呀！

場外音：靜香

場外音：佢食毒品呀！

靜：走呀走呀你地！

場外音：靜香

場外音：瘦左好多呀…但係好古怪。

靜：我唔係！

場外音：佢三日無番學喇。

靜：走呀走呀你地！

場外音：佢個黑眼圈大到…

靜：你地同我全部走開呀！

【突然，場外音停止。靜香發現街上只得自己一人。】

靜：無人嘅，原來只係得我一個……好得人驚訝！

【她鬼鬼祟祟，要跑回家。大雄一直在角落看見她的舉動。】

雄：靜香…點解靜香會變成咁…

【靜香回到家，她依賴著冰毒大王，吸食的份量不斷增加…這時的靜香，已經和平常不同。】

冰：等我將你變成我嘅部下，「冰瘡怪」！

【靜香已經慢慢變成惡毒的「冰瘡怪」。】

冰：冰瘡怪，我依家就派你去俾啲毒品俾其他小朋友食！

靜：無問題，冰瘡冰瘡！！

【大雄不來一直偷看著事態的發展，突然，他被「冰瘡怪」發現了！】

雄：靜香，停手呀！

靜：冰瘡冰瘡！

雄：靜香，係我呀！大雄！

靜：我唔知邊個係大雄，但係我地可以做個好朋友。我有 D 好野益你！

雄：唔好呀，醒呀，靜香！

靜：醒？我一直都好清醒！過黎試下我為你炮製嘅大餐！（追著大雄）

雄：（逃走）靜香，唔好呀！醒下！停低呀！

靜：哈哈，走係無用架！試下我呢隻「冰鎮豬手」啦！

【靜香一手抓住大雄，大雄不能動彈。】

雄：呀！好辛苦呀！

靜：小朋友，俾我捉住左喇喎！不如就試下我嘅新產品，加左料嘅…「冰鎮奶茶」！

雄：唔好呀！停手呀！呢個時候，都要用多啦 A 夢嘅法寶喇！

【大雄驚叫。他從百寶袋中不斷掏出法寶，他掏出搖搖頭竹蜻蜓。】

雄：搖搖頭竹蜻蜓！用左搖搖頭竹蜻蜓，見到毒品就可以搖搖頭，向毒品說不！

靜：冰瘡冰瘡！朋友！食毒品啦！聞下我樽「真多冰」啦！

【大雄使用搖搖頭竹蜻蜓】

雄：唔食！

靜：食啦！

雄：唔食！

靜：我叫你吸毒呀！

雄：NONONONONONONONONONONO！

【靜香被拒絕，無從入手！十分憤怒】

靜：激死我喇！！

雄：梗係啦，搖搖頭竹蜻蜓，搖頭、SAY NO 你至型！

靜：(大叫) 激死我。(突然變得溫柔，向大雄及在座的觀眾) 小朋友，你地試下

啦，個感覺好得意架！我係你嘅朋友(走向小朋友)，試下啦！

雄：各位小朋友，千奇唔好試呀！快啲跟我一齊講，唔食唔食搖搖頭啦！齊齊拒

絕佢。

【大雄和小朋友一起使用搖搖頭竹蜻蜓，拒絕毒品！】

靜：黎啦黎啦！吸毒啦，我咩都有，丸仔、咳水咩都有！你要啲咩呀？(被所有

人拒絕，有如中招一讓，被迫退後) 激死我喇！！

【大雄拿出法寶，掃毒死光槍】

雄：呢個時候，我有第二樣法寶。掃毒死光槍，一定要救番靜香！只要我地用掃

毒死光槍，就可以清除靜香身上嘅所有毒癮！

【大雄向冰瘡怪開槍，慢慢開始見到被毒品控制的靜香…】

靜：(虛弱)大雄…救我呀！

雄：靜香！

靜：（被冰瘡怪再次控制）哈哈哈哈哈，如果你想殺死靜香，就繼續開槍啦！

靜：（虛弱）救命呀大雄！

雄：可惡呀！

【此時，冰毒大王出現。】

冰：係邊個要殺死我可愛嘅冰瘡怪呀？（指大雄，憤怒）係你？你拒絕毒品，

咁…我就夾硬逼你食！冰瘡怪，捉住佢！

靜：冰瘡冰瘡！

**【靜香不斷追著大雄，大雄四處走避！大雄及時拿出法寶，按到時間停止器，時
停止二十秒。】**

雄：（鬆一口氣）時間停止器，用左時間停止器，可停止該人物嘅動作二十秒。

咁即係……

【此時，冰毒大王和靜香已經在他的身後。】

冰：即係話我地已經喺你後面！

【二人不斷追著大雄，大雄四處走避！他及時又再次按到時間停止器】

雄：小朋友，我地無時間喇！（拿出法寶）不不不時光機。只要用不不不時光機，

就會時間倒流，番番轉頭！俾靜香重新選擇多一次，等佢唔好食毒品！多啦

A 夢講過，其他人用佢嘅法寶，會無咁厲害架！我需要你地俾能量我，將時

光倒流番去靜香吸毒之前…我希望所有觀眾可以舉起你地雙手，俾啲力量

我，並且 1,2,3 之後大叫 – 不不不，拒絕毒品個個得！

【大雄和觀眾說出口號，可是力量不足，此時，二十秒時限過去，「冰瘡怪」和冰毒大王又再次活動起來。】

冰：又二十秒喇！今次你實會食毒品！

雄：最後一次，大家舉起雙手，講口號！一、二、三，-不不不，拒絕毒品個個得！

【此時，天旋地轉，時光倒流】

三人：時間倒流，番番轉頭！如果俾靜香重新選擇一次，佢會點揀呢？

【冰毒大王再次回到從二次元出口出現那刻。可是，這時候，大雄已經趕到。】

冰：咁古怪嘅，呢度係地球，好似黎過一次咁。呀！我記得喇，係呢個細路女，我要引誘佢食毒品！

【此時，靜香出。】

冰：好，一切由你決定。試下毒品啦！

雄：等等！靜香，唔好信佢！毒品會帶黎好多禍害！（拿出拒絕三招神奇手套）

拒絕三招神奇手套！

【把手套交給靜香。靜香帶上手套。】

雄：拒絕三招第一式，直接說不！

冰：我都唔知你講乜！

雄：靜香，你要加油呀！

靜：直接說不！我係唔會食毒品架！

【靜香一拳打向冰毒大王】

冰：(中招) 哎呀！（走向靜香）激死我！等我再接再厲先！我地係F R I E N

D黎架！唔會呃你！

雄：第二式，金蟬脫殼。

靜：唔好意思，我要走先。(靜香一閃身，避開了冰毒大王。並向他揮拳反擊)

冰：(中招) 哎呀！痛死我喇！我要出絕招！（儲氣）冰冰冰冰冰冰冰冰冰冰

冰！

靜：冰你個頭，拒絕三招第三式，直接反擊！你都唔好食啦！我地去溫書啦！

【靜香一拳打向冰毒大王！再加一腳，把他踢出二次元出口。】

場外音：我會番黎架！

【冰毒大王被打敗，一切回復平靜。】

靜：好累呀！

雄：靜香，你嘅拒絕三招好厲害呀！

靜：無錯！我會記住，拒絕三招，(在耍功夫) 第一招，直接說不！直接拒絕俾

毒品我食嘅壞人！

雄：做得好呀！第二招，金蟬脫殼！借啲易，快快離開現場！

靜：第三招。

靜與雄：直接反擊！叫吸毒口果個人人都唔好吸毒，一齊去做啲有意義嘅事！

雄：其實靜香，我覺得你好好，讀書又叻。身型絕對唔係一個問題！我……地個
個朋友都好鍾意你！

靜：大雄，多謝你救番我。

雄：唔使多謝。靜香，因為左慶祝你戰勝左冰毒大王同遠離左毒品，我作左首歌
鼓勵你架…

靜：真既？嘩，係一首好好聽既歌？嘩你好細心呀！我最鍾意唱歌架，快 D 教
我啦！

大雄：好啦！

(用 TRINKLE TRINKLE LITTLE STAR 音樂)

千祈唔好食毒品

毒品真係唔吸引

食毒品變醜樣人

我會 SAY NO 兼走人

如果見到有毒品

一齊 SAY NO NO PROBLEM !

靜：(死_-“十分尷尬)大雄。你……真……係……唱歌同胖虎一樣咁好聽呀！

雄：你唔鍾意呀？

靜：多謝你呀大雄。

雄：你鍾意就太好喇！如果我地下個星期可以去咖啡店飲下咖啡……

靜：飲你個頭，下個星期係期考！你要同我一齊溫習，唔係一定留班！

【大雄拿起拒絕三招拳套】

雄：拒絕三招神奇手套，直接說不，靜香，我係唔會溫習嘅。

【靜香怒視大雄。】

靜：（憤怒）大雄！

雄：直接反擊！靜香，不如你都唔好溫習，我地去飲下咖啡先啦！

靜：（憤怒）大雄，拒絕三招係對付毒品架，而唔係對付溫習！

雄：（害怕）或者係，金蟬脫殼！靜香，我都係走先，下次見！！

【靜香追著大雄，邊叫：唔準走呀，溫書！二人跑著離開。最後，三位演員出場。】

演一：小朋友，記住，故事入面靜香可以時間倒流，從頭黎過，重新選擇。

演二：但係，現實生活中並唔可以！

演三：生活中有好多野都要我地自己選擇。

演一：你永遠唔知道，冰毒大王會幾時再出現，好可能，下一秒，就會出現喺你
身邊，叫你依毒品。

演二：所以，我地要時刻警覺，提防佢黎引誘我地每一個。

演三：希望大家記住。跟我地一齊講呢個口號…

三人：「吸食毒品禍害多，唔好當佢小兒科」！

【演員和觀眾齊齊喊出口號。】

【全劇完。】